

ЎЗБЕКИСТОН RESPUBLIKACI MOЛИЯ BAZИРИНИНГ
БУЙРУФИ**79 Қайта ишлашга берилган хом ашё билан боғлиқ операцияларни бухгалтерия ҳисобида акс эттириш тартиби тўғрисидаги низомни тасдиқлаш тўғрисида**

*Ўзбекистон Республикаси Адлия вазирлиги томонидан 2010 йил
15 мартда рўйхатдан ўтказилди, рўйхат рақами 2086*

(2010 йил 25 мартдан кучга киради)

Ўзбекистон Республикасининг «Бухгалтерия ҳисоби тўғрисида»ги Қонунининг (Ўзбекистон Республикаси Олий Мажлисининг Ахборотномаси, 1996 йил, 9-сон, 142-модда) 5-моддасига мувофиқ **буюраман**:

1. Қайта ишлашга берилган хом ашё билан боғлиқ операцияларни бухгалтерия ҳисобида акс эттириш тартиби тўғрисидаги низом иловага мувофиқ тасдиқлансин.

2. Мазкур буйруқ Ўзбекистон Республикаси Адлия вазирлигида давлат рўйхатидан ўтказилган кундан бошлаб ўн кун ўтгандан кейин кучга киради.

Вазир

Р. АЗИМОВ

Тошкент ш.,
2010 йил 17 февраль,
12-сон

Ўзбекистон Республикаси
молия вазирининг 2010 йил 17 февралдаги
12-сонли буйруғига
ИЛОВА

**Қайта ишлашга берилган хом ашё билан боғлиқ
операцияларни бухгалтерия ҳисобида акс эттириш
тартиби тўғрисидаги
НИЗОМ**

Мазкур Низом «Бухгалтерия ҳисоби тўғрисида»ги Ўзбекистон Республикаси Қонунига (Ўзбекистон Республикаси Олий Мажлисининг Ахборотномаси, 1996 йил, 9-сон, 142-модда) мувофиқ қайта ишлашга берилган хом ашё билан боғлиқ операцияларни бухгалтерия ҳисобида акс эттириш тартибини белгилайди.

Мазкур Низом бюджет ва суғурта ташкилотлари, банклар ва бошқа кре-

дит ташкилотларидан ташқари барча хўжалик юритувчи субъектлар — юридик шахсларга (кейинги ўринларда — ташкилот деб юритилади) қўлланади.

1-§. Умумий қоидалар

1. Мазкур Низомда куйидаги асосий тушунчалар қўлланилади:

буюртмачи — давал хом ашёсини саноат асосида қайта ишлашга бераётган ташкилот;

қайта ишловчи — давал хом ашёсини саноат асосида қайта ишлашга қабул қилувчи ва қайта ишлашдан олинган маҳсулотни келгусида буюртмачига қайтариб берувчи ташкилот;

давал хом ашёси — давал хом ашёсини қайта ишлаш тўғрисида тузилган шартномага мувофиқ, буюртмачига қайта ишлашдан олинган маҳсулотни қайтариб бериш шarti билан саноат асосида қайта ишлаш учун бошқа шахсга — қайта ишловчига берилган ва буюртмачига тегишли бўлган хом ашё ва материаллар.

2. Мазкур Низом пудрат шартномаларининг алоҳида турлари (маиший пудрат, қурилиш пудрати, лойиҳалаш ёки қидирув ишлари пудрати, илмий-тадқиқот, тажриба-конструкторлик ва технология ишлари пудрати) ҳамда биргаликдаги фаолиятни амалга ошириш учун оддий ширкат шартномаси билан боғлиқ операцияларни ҳисобга олишга қўлланилмайди.

3. Қишлоқ хўжалиги ва бошқа ташкилотларга, шунингдек жисмоний шахсларга донни қайта ишлаш юзасидан кўрсатиладиган хизматлар бўйича дастлабки ҳисоб (ҳужжатларни расмийлаштириш) Ўзбекистон Республикаси Вазирлар Маҳкамасининг 2006 йил 25 майдаги 95-сонли қарори билан тасдиқланган «Дон ва дон маҳсулотларини қабул қилиш, сақлаш, ички ташиш, қайта ишлаш ва сотишнинг дастлабки ҳисобини юритиш ва расмийлаштириш тартиби тўғрисидаги низом»га (Ўзбекистон Республикаси қонун ҳужжатлари тўплами, 2006 й., 22-сон, 191-модда) мувофиқ амалга оширилади.

4. Буюртмачида ва қайта ишловчида тузиладиган бошланғич ҳужжатларнинг мажбурий реквизитлари, уларни тузиш, қабул қилиш, сақлаш тартиби, шунингдек ҳужжатлар айланишини амалга ошириш тартиби «Бухгалтерия ҳисоби тўғрисида»ги Ўзбекистон Республикаси Қонунининг 9-моддасига ва Бухгалтерия ҳисобида ҳужжатлар ва ҳужжатлар айланиши тўғрисидаги низомга (рўйхат рақами 1297, 2004 йил 14 январь) (Ўзбекистон Республикаси қонун ҳужжатлари тўплами, 2004 йил, 1-2-сон, 24-модда) мувофиқ тартибга солинади.

2-§. Давал хом ашёси билан боғлиқ операцияларнинг буюртмачида бухгалтерия ҳисоби

5. Хом ашё ва материалларнинг харид қилиш қиймати Ўзбекистон Республикаси Бухгалтерия ҳисобининг миллий стандарти (4-сонли БҲМС) «То-

вар-моддий захиралари»да (рўйхат рақами 1595, 2006 йил 17 июль) (Ўзбекистон Республикаси қонун ҳужжатлари тўплами, 2006 йил, 28-29-сон, 282-модда) белгиланган тартибда аниқланади ва бухгалтерия ҳисобининг счётларида Ўзбекистон Республикаси Бухгалтерия ҳисобининг миллий стандарти (21-сонли БХМС) Хўжалик юритувчи субъектларнинг молиявий-хўжалик фаолияти бухгалтерия ҳисоби счётлар режаси ва уни қўллаш бўйича йўриқномага (рўйхат рақами 1181, 2002 йил 23 октябрь) (Ўзбекистон Республикаси вазирликлари, давлат қўмиталари ва идораларининг меъёрий ҳужжатлари ахборотномаси, 2002 йил, 20-сон) мувофиқ акс эттирилади.

6. Давал хом ашёси қайта ишловчига берилганда унинг қиймати баланстан ҳисобдан чиқарилмайди, балки 1070 «Четга қайта ишлаш учун берилган материаллар» счётида бошқа тегишли материалларни ҳисобга олувчи счётларда (1000) ҳисобга олинган қиймати бўйича ҳисобга олинади.

7. Давал хом ашёсини қайта ишлаш бўйича бажарилган ишлар бевосита қайта ишлаш натижасида олинган маҳсулотлар ҳисобга олинadиган счётларнинг дебетига олиб борилади ва агар қайта ишлашдан олинган маҳсулот бевосита:

а) асосий фаолият тури ҳисобланган тайёр маҳсулотларни ишлаб чиқаришга (иш бажариш, хизматлар кўрсатишга) берилса — асосий ишлаб чиқаришни ҳисобга олувчи счётларда (2000);

б) ташкилотнинг асосий ишлаб чиқаришига ёки асосий фаолиятига хизмат кўрсатувчи ёрдамчи ишлаб чиқаришга берилса — ёрдамчи ишлаб чиқаришни ҳисобга олувчи счётларда (2300);

в) умумишлабчиқариш мақсадларида фойдаланиш учун берилса — умумишлабчиқариш харажатларини ҳисобга олувчи счётларда (2500);

г) ишлаб чиқаришдаги ярқсиз маҳсулотларни бартараф этиш учун берилса — ишлаб чиқаришдаги ярқсиз маҳсулотларни ҳисобга олувчи счётларда (2600);

д) хизмат кўрсатувчи хўжаликлар эҳтиёжларида фойдаланиш учун берилса — хизмат кўрсатувчи хўжаликларни ҳисобга олувчи счётларда (2700);

е) хўжалик фаолиятида келгусидаги фойдаланиш учун буюртмачининг омборига берилса — тегишли материалларни ҳисобга олувчи счётларда (1000) ҳисобга олинади.

8. Давал хом ашёсини қайта ишловчига бериш мазкур Низомнинг 1 ва 2-сонли иловаларига мувофиқ «Давал хом ашёсини қабул қилиш-топшириш далолатномаси» ёки «Давал хом ашёсини топшириш накладной» билан расмийлаштирилади.

«Давал хом ашёсини қабул қилиш-топшириш далолатномаси» ва «Давал хом ашёсини топшириш накладной» икки нусхада тузилади ва буюртмачи ва қайта ишловчининг ваколатли шахслари томонидан имзоланади, томонларнинг муҳри билан тасдиқланади. Биринчи нусха қайта ишловчига берилади, иккинчиси эса буюртмачида қолади.

9. Агарда давал хом ашёсини қайта ишлаш учун тузилган шартнома шартларига кўра қайтарилadиган чиқиндилар буюртмачига бериладиган бўлса, у ҳолда улар келгусида фойдаланиш ва/ёки сотиш мумкин бўлган қиймати

бўйича 1090 «Бошқа материаллар» счётининг дебетида давал хом-ашёсини қайта ишлашдан олинган маҳсулотлар ҳисобга олинадиган тегишли счётлар билан корреспонденцияланган ҳолда кирим қилинади.

10. Давал хом ашёси билан боғлиқ операциялар бухгалтерия ҳисобида қуйидагича акс эттирилади:

а) давал хом ашёсини қайта ишлашга берилганда:

дебет 1070 «Четга қайта ишлаш учун берилган материаллар» счёти — берилаётган давал хом ашёсининг суммасига, буюртмачида ҳисобга олинган қиймати бўйича;

кредит материалларни ҳисобга олувчи счётлар (1000);

б) давал хом ашёсини қайта ишлаш шартномасида кўзда тутилган миқдорда бўнак тўловлари амалга оширилганда:

дебет мол етказиб берувчилар ва пудратчиларга берилган бўнақларни ҳисобга олувчи счётлар (4300) — бўнак тўловлари суммасига;

кредит пул маблағларини ҳисобга олувчи счётлар;

в) давал хом ашёсининг қийматини ишлаб чиқариш харажатларига олиб борилганда:

дебет асосий ишлаб чиқаришни ҳисобга олувчи счётлар (2000), ёрдамчи ишлаб чиқаришни ҳисобга олувчи счётлар (2300), умумишлабчиқариш харажатларини ҳисобга олувчи счётлар (2500), ишлаб чиқаришдаги яроқсиз маҳсулотларни ҳисобга олувчи счётлар (2600), хизмат кўрсатувчи хўжаликларни ҳисобга олувчи счётлар (2700);

кредит 1070 «Четга қайта ишлаш учун берилган материаллар» счёти;

г) давал хом ашёсини қайта ишлаш бўйича бажарилган ишлар қиймати ишлаб чиқариш харажатларига олиб борилганда ва агар давал хом ашёсини қайта ишлашдан олинган маҳсулот буюртмачи томонидан бевосита маҳсулотлар ишлаб чиқаришга (ишлар бажаришга, хизматлар кўрсатишга) берилса:

дебет асосий ишлаб чиқаришни ҳисобга олувчи счётлар (2000), ёрдамчи ишлаб чиқаришни ҳисобга олувчи счётлар (2300), умумишлабчиқариш харажатларини ҳисобга олувчи счётлар (2500), ишлаб чиқаришдаги яроқсиз маҳсулотларни ҳисобга олувчи счётлар (2600), хизмат кўрсатувчи хўжаликларни ҳисобга олувчи счётлар (2700);

кредит 6010 «Мол етказиб берувчилар ва пудратчиларга тўланадиган счётлар», 6110 «Ажратилган бўлинмаларга тўланадиган счётлар», 6120 «Шўъба ва қарам хўжалик жамиятларига тўланадиган счётлар», 6990 «Бошқа мажбуриятлар» счёти ва бошқа мажбуриятларни ҳисобга олувчи счётлар;

д) давал хом ашёсини қайта ишлашдан олинган маҳсулот буюртмачининг омборига хўжалик фаолиятида келгусида фойдаланиш учун келиб тушганда:

дебет материалларни ҳисобга олувчи счётлар (1000);

кредит 1070 «Четга қайта ишлаш учун берилган материаллар» счёти;

е) давал хом ашёсини қайта ишлаш бўйича бажарилган ишлар қиймати давал хом ашёсини қайта ишлашдан олинган маҳсулот қийматига олиб борилганда ва агар давал хом ашёсини қайта ишлашдан олинган маҳсулот бе-

восита буюртмачининг омборига келгусида хўжалик фаолиятида фойдаланиш учун келиб тушганда:

дебет материалларни ҳисобга олувчи счётлар (1000);

кредит 6010 «Мол етказиб берувчилар ва пудратчиларга тўланадиган счётлар», 6110 «Ажратилган бўлинмаларга тўланадиган счётлар», 6120 «Шўъба ва қарам хўжалик жамиятларига тўланадиган счётлар», 6990 «Бошқа мажбуриятлар» счёти ва бошқа мажбуриятларни ҳисобга олувчи счётлар;

ж) давал хом ашёсини қайта ишлаш бўйича қабул қилинган бажарилган ишлар бўйича қўшилган қиймат солиғини (ҚҚС) тўловчи корхоналар учун ҳисобга олинадиган ҚҚС суммасига:

дебет 4410 «Бюджетга солиқлар ва бошқа мажбурий тўловлар бўйича бўнак тўловлари (турлари бўйича)»;

кредит 6010 «Мол етказиб берувчилар ва пудратчиларга тўланадиган счётлар», 6110 «Ажратилган бўлинмаларга тўланадиган счётлар», 6120 «Шўъба ва қарам хўжалик жамиятларига тўланадиган счётлар», 6990 «Бошқа мажбуриятлар» счёти ва бошқа мажбуриятларни ҳисобга олувчи счётлар;

з) давал хом ашёсини қайта ишлаш бўйича қабул қилинган бажарилган ишлар бўйича ҚҚСни тўловчи ҳисобланмайдиган корхоналар учун ҚҚС суммасига:

дебет асосий ишлаб чиқаришни ҳисобга олувчи счётлар (2000), ёрдамчи ишлаб чиқаришни ҳисобга олувчи счётлар (2300), умумишлабчиқариш харажатларини ҳисобга олувчи счётлар (2500), ишлаб чиқаришдаги яроқсиз маҳсулотларни ҳисобга олувчи счётлар (2600), хизмат кўрсатувчи хўжаликларни ҳисобга олувчи счётлар (2700), материалларни ҳисобга олувчи счётлар (1000) — давал хом ашёсини қайта ишлашдан олинган маҳсулот қайси счётда ҳисобга олинишига қараб;

кредит 6010 «Мол етказиб берувчилар ва пудратчиларга тўланадиган счётлар», 6110 «Ажратилган бўлинмаларга тўланадиган счётлар», 6120 «Шўъба ва қарам хўжалик жамиятларига тўланадиган счётлар», 6990 «Бошқа мажбуриятлар» счёти ва бошқа мажбуриятларни ҳисобга олувчи счётлар;

и) давал хом ашёсини қайта ишлашдан олинган маҳсулотни белгиланган ёки сақлаш жойигача етказиб бериш билан боғлиқ қўшимча харажатлар амалга оширилганда:

дебет асосий ишлаб чиқаришни ҳисобга олувчи счётлар (2000), ёрдамчи ишлаб чиқаришни ҳисобга олувчи счётлар (2300), умумишлабчиқариш харажатларини ҳисобга олувчи счётлар (2500), ишлаб чиқаришдаги яроқсиз маҳсулотларни ҳисобга олувчи счётлар (2600), хизмат кўрсатувчи хўжаликларни ҳисобга олувчи счётлар (2700), материалларни ҳисобга олувчи счётлар (1000) — давал хом ашёсини қайта ишлашдан олинган маҳсулот қайси счётда ҳисобга олинишига қараб;

кредит меҳнат ҳақи бўйича ходимлар билан ҳисоблашишларни ҳисобга олувчи счётлар (6700), суғурта ва мақсадли давлат жамғармаларига тўловлар бўйича қарзни ҳисобга олувчи счётлар (6500), турли кредиторларга бўлган қарзларни ҳисобга олувчи счётлар (6900) ва бошқа тегишли счётлар;

к) қайта ишловчига илгари берилган бўнаклар ҳисобга олинганда:

дебет 6010 «Мол етказиб берувчилар ва пудратчиларга тўланадиган счётлар», 6110 «Ажратилган бўлинмаларга тўланадиган счётлар», 6120 «Шўъба ва қарам хўжалик жамиятларига тўланадиган счётлар», 6990 «Бошқа мажбуриятлар» счёти ва бошқа мажбуриятларни ҳисобга олувчи счётлар;

кредит мол етказиб берувчилар ва пудратчиларга берилган бўнакларни ҳисобга олувчи счётлар (4300);

л) давал хом ашёсини қайта ишлаш бўйича бажарилган ишлар учун қайта ишловчи олдидаги қарздорлик тўланганда:

дебет 6010 «Мол етказиб берувчилар ва пудратчиларга тўланадиган счётлар», 6110 «Ажратилган бўлинмаларга тўланадиган счётлар», 6120 «Шўъба ва қарам хўжалик жамиятларига тўланадиган счётлар», 6990 «Бошқа мажбуриятлар» счёти ва бошқа мажбуриятларни ҳисобга олувчи счётлар;

кредит пул маблағларини ҳисобга олувчи счётлар;

м) бюджетга тўловлар бўйича якуний ҳисоб-китоб қилинганда, қайта ишловчининг бажарган ишлари бўйича илгари тўланган ҚҚС суммасини ҳисобга олиб борилганда:

дебет 6410 «Бюджетга тўловлар бўйича қарз (турлари бўйича)»;

кредит 4410 «Бюджетга солиқлар ва бошқа мажбурий тўловлар бўйича бўнак тўловлари (турлари бўйича)»;

н) қайта ишламасдан қайтариб берилган давал хом ашёси кирим қилинганда:

дебет материалларни ҳисобга олувчи счётлар (1000);

кредит 1070 «Четга қайта ишлаш учун берилган материаллар» счёти.

11. Материалларнинг келгусидаги ҳисоби ва тайёр маҳсулотнинг тан-нархини аниқлаш, шу жумладан уларнинг четга чиқиб кетиши (сотилиши, устав капиталига улуш сифатида берилиши, бепул бериш ва ҳ. к.) қонунчиликда белгиланган тартибда амалга оширилади.

3-§. Давал хом ашёси билан боғлиқ операцияларнинг қайта ишловчида бухгалтерия ҳисоби

12. Маҳсулотларни ишлаб чиқариш (ишлар бажариш, хизматлар кўрсатиш) ҳам ўзининг хом ашёсидан, ҳамда давал хом ашёсидан амалга оширилса, давал хом ашёси билан боғлиқ операцияларнинг алоҳида ҳисобини юритиш лозим. Қайта ишловчи давал хом ашёсининг аналитик ҳисобини ҳар бир буюртмачи бўйича алоҳида юритади.

13. Олинган давал хом ашёси балансдан ташқари 003 «Қайта ишловга қабул қилинган материаллар» счётида давал хом ашёсини қайта ишлаш шартномасида кўзда тутилган нархи бўйича ҳисобга олинади.

14. Давал хом ашёси ҳаракатининг назоратини таъминлаш мақсадида ушбу Низомнинг 3-иловасидаги шаклга мувофиқ «Давал хом ашёсини ҳисобга олиш ведомости»ни юритиш лозим. Давал хом ашёсини ҳисобга олиш ведомости қайта ишловчининг раҳбари томонидан қонунчиликда белгиланган тартибда ваколатланган шахслар томонидан имзоланади. Мазкур ведомост-

да давал хом ашёсининг миқдор ва суммавий кўрсаткичларининг камайиши тўғрисидаги маълумот, унинг турлари бўйича тегишли қаторида «минус» белгиси билан кўрсатилади.

15. Давал хом ашёсини қайта ишлаш бўйича бажарилган ишлар қиймати, технология ва ишлаб чиқаришни ташкил этиш билан асосланган давал хом ашёсини қайта ишлаш билан бевосита боғлиқ харажатларни ўз ичига олган ҳолда уларнинг ишлаб чиқариш таннархи бўйича тан олинади.

16. Давал хом ашёсини қайта ишлаш бўйича бажарилган ишларнинг ишлаб чиқариш таннарига кирувчи харажатлар таркиби Ўзбекистон Республикаси Вазирлар Маҳкамасининг 1999 йил 5 февралдаги 54-сонли қарори билан тасдиқланган «Маҳсулот (ишлар, хизматлар)ни ишлаб чиқариш ва сотиш харажатлари таркиби ҳамда молиявий натижаларни шакллантириш тартиби тўғрисида»ги низомга (Ўзбекистон Республикаси Ҳукумати қарорлари тўплами, 1999 й., 2-сон, 9-модда) мувофиқ аниқланади.

17. Қайта ишловчи томонидан амалга оширилган давал хом ашёсини қайта ишлашдан олинган маҳсулотни буюртмачигача етказиб бериш харажатлари давал хом ашёсини қайта ишлаш бўйича бажарилган ишларнинг ишлаб чиқариш таннарига қўшилмайди, балки давр харажатларига олиб борилади.

18. Давал хом ашёсини қайта ишлаш бўйича ишларни бажариш харажатлари бухгалтерия ҳисобида қуйидагича юритилади:

а) давал хом ашёсини қайта ишлаш бўйича ишларни бажариш асосий фаолият тури ҳисобланадиган ташкилотларда — асосий ишлаб чиқаришни ҳисобга олувчи счётларда (2000);

б) давал хом ашёсини қайта ишлаш бўйича ишларни бажариш ёрдамчи фаолият тури ҳисобланадиган ташкилотларда — ёрдамчи ишлаб чиқаришни ҳисобга олувчи счётларда (2300);

в) давал хом ашёсини қайта ишлаш бўйича ишларни бажариш хизмат кўрсатувчи хўжаликлар томонидан амалга ошириладиган ташкилотларда — хизмат кўрсатувчи хўжаликларни ҳисобга олувчи счётларда (2700).

19. Агар давал хом ашёсини қайта ишлаш бўйича тузилган шартноманинг шартларига мувофиқ қайтариладиган чиқиндилар қайта ишловчида қолдирилса, унда улар келгусида фойдаланиш ва/ёки сотиш мумкин бўлган қиймати бўйича 1090 «Бошқа материаллар» счётининг дебетида асосий фаолиятнинг бошқа даромадларини ҳисобга олувчи счётлар (9300) билан корреспонденцияланган ҳолда кирим қилинади.

20. Давал хом ашёсини қайта ишлашдан олинган маҳсулот буюртмачига қайтариб берилганда, давал хом ашёсини қайта ишлаш бўйича ишларнинг ҳақиқатда бажарилганлигини тасдиқловчи счёт-фактура, ҳамда ушбу Низомнинг 4 ва 5-иловаларига мувофиқ шаклда «Давал хом ашёсини қайта ишлашдан олинган маҳсулотни қабул қилиш-топшириш далолатномаси» ва «Давал хом ашёсининг ишлатилиши тўғрисида ҳисобот» ёзиб берилади.

21. «Давал хом ашёсини қайта ишлашдан олинган маҳсулотни қабул қилиш-топшириш далолатномаси» икки нусхада тузилади, буюртмачи ва қайта ишловчининг вакиллари томонидан имзоланади ҳамда иккала томоннинг

муҳрлари билан тасдиқланади. Биринчи нусха буюртмачига берилади, иккинчиси эса қайта ишловчида қолади.

22. «Давал хом ашёсининг ишлатилиши тўғрисида ҳисобот» ҳам икки нусхада тузилади, қайта ишловчининг ваколатли шахси томонидан имзоланади. Биринчи нусха буюртмачига берилади, иккинчиси эса қайта ишловчида қолади.

23. Счёт-фактуранинг шакли ва уни тўлдириш тартиби Ўзбекистон Республикаси Молия вазирлиги ва Ўзбекистон Республикаси Давлат солиқ қўмитасининг 2007 йил 29 декабрдаги 111, 2007-66-сонли «Солиқ ҳисоботининг шакллари тасдиқлаш тўғрисида»ги қарори билан тасдиқланган (рўйхат рақами 1760, 2008 йил 21 январь) (Ўзбекистон Республикаси қонун ҳужжатлари тўплами, 2008 йил, 3-4-сон, 15-модда).

24. Давал хом ашёсини қайта ишлаш билан боғлиқ операциялар қайта ишловчининг бухгалтерия ҳисобида қуйидагича акс эттирилади:

а) тузилган шартномага мувофиқ давал хом ашёсини олганда:

дебет 003 «Қайта ишловга қабул қилинган материаллар» счёти — буюртмачидан олинган қиймати бўйича материаллар суммасига;

б) давал хом ашёсини қайта ишлаш шартномасида кўзда тутилган миқдордаги бўнак тўловлари келиб тушганда:

дебет пул маблағларини ҳисобга олувчи счётлар;

кредит 6310 «Харидорлар ва буюртмачилардан олинган бўнақлар» счёти;

в) давал хом ашёсини қайта ишлаш харажатларини акс эттириш:

дебет асосий ишлаб чиқаришни ҳисобга олувчи счётлар (2000), ёки ёрдамчи ишлаб чиқаришни ҳисобга олувчи счётлар (2300), ёки хизмат кўрсатувчи хўжаликларни ҳисобга олувчи счётлар (2700);

кредит асосий воситаларнинг эскиришини ҳисобга олувчи счётлар (0200), номоддий активлар амортизациясини ҳисобга олувчи счётлар (0500), материалларни ҳисобга олувчи счётлар (1000), 2510 «Умумишлабчиқариш харажатлари» счёти, 6710 «Меҳнат ҳақи бўйича ходим билан ҳисоблашишлар» счёти, 6520 «Мақсадли давлат жамғармаларига тўловлар» счёти ва бошқа тегишли счётлар;

г) тузилган шартномага мувофиқ, олинган давал хом ашёсини қайта ишлагандан кейин ва буюртмачига қайта ишланган маҳсулот қайтарилгандан сўнг ҳисобдан чиқарилиши:

кредит 003 «Қайта ишловга қабул қилинган материаллар» счёти;

д) давал хом ашёсини қайта ишлаш бўйича бажарилган ишлардан даромаднинг ҳисобланиши:

дебет 4010 «Харидорлар ва буюртмачилардан олинган счётлар» счёти;

кредит 9030 «Ишлар бажариш ва хизматлар кўрсатишдан даромадлар» счёти;

е) давал хом ашёсини қайта ишлаш бўйича бажарилган ишларнинг таннархи ҳисобдан чиқарилганда:

дебет 9130 «Бажарилган иш ва кўрсатилган хизматларнинг таннархи» счёти;

кредит асосий ишлаб чиқаришни ҳисобга олувчи счётлар (2000), ёки

ёрдамчи ишлаб чиқаришни ҳисобга олувчи счётлар (2300), ёки хизмат кўрсатувчи хўжаликларни ҳисобга олувчи счётлар (2700);

ж) давал хом ашёсини қайта ишлаш бўйича бажарилган ишлар бўйича ҳисобланган ҚҚС суммасига:

дебет 4010 «Харидорлар ва буюртмачилардан олинадиган счётлар» счёти;

кредит 6410 «Бюджетга тўловлар бўйича қарз (турлари бўйича)» счёти;

з) давал хом ашёсини қайта ишлашда олинган ва қайта ишловчида қоладиган қайтариладиган чиқиндилар қиймати:

дебет 1090 «Бошқа материаллар» счёти;

кредит 9390 «Бошқа операцион даромадлар» счёти;

и) шартномага мувофиқ қайта ишловчи томонидан амалга оширилдиган, давал хом ашёсини қайта ишлашдан олинган маҳсулотни буюртмачига етказиб бериш билан боғлиқ харажатлар суммасига:

дебет 9410 «Сотиш харажатлари» счёти;

кредит материалларни ҳисобга олувчи счётлар (1000), меҳнат ҳақи бўйича ходим билан ҳисоблашишларни ҳисобга олувчи счётлар (6700), суғурта ва мақсадли давлат жамғармаларига тўловлар бўйича қарзни ҳисобга олувчи счётлар (6500) ва бошқа тегишли счётлар;

к) буюртмачидан илгари олинган бўнақлар ҳисобга олинганда:

дебет 6310 «Харидорлар ва буюртмачилардан олинган бўнақлар» счёти;

кредит 4010 «Харидорлар ва буюртмачилардан олинадиган счётлар» счёти;

л) буюртмачидан давал хом ашёсини қайта ишлаш бўйича бажарилган ишлар учун, ҚҚС суммасини ҳисобга олган ҳолда пул маблағлари келиб тушганда:

дебет пул маблағларини ҳисобга олувчи счётлар;

кредит 4010 «Харидорлар ва буюртмачилардан олинадиган счётлар» счёти;

м) ҚҚС бўйича бюджет олдидаги қарздорлик суммаси қопланганда:

дебет 6410 «Бюджетга тўловлар бўйича қарз (турлари бўйича)» счёти;

кредит пул маблағларини ҳисобга олувчи счётлар.

Қайта ишлашга берилган хом ашё билан
боғлиқ операцияларни бухгалтерия ҳисобида
акс эттириш тартиби тўғрисидаги низомга
1-ИЛОВА

**Давал хом ашёсини қабул қилиш-топшириш
ДАЛОЛАТНОМАСИ**
_____ -сон

Тузилган санаси «__» _____ 20__ й.

Давалга берувчи _____
(юридик шахснинг тўлиқ номи)

Манзили: _____ СТИР _____

Қайта ишловчи _____
(юридик шахснинг тўлиқ номи)

Манзили: _____ СТИР _____

Ушбу далолатнома бўйича Давалга берувчи хом ашёни топширмақда, Қайта ишловчи эса хом ашёни қайта ишлаш учун қабул қилмоқда.

Томонлар келишувига мувофиқ хом ашёни сақлаш ва қайта ишлаш жойи бўлиб
_____ белгиланди.
(манзил)

Т/р	Хом ашё ва материаллар		Миқдори (_____ да) (ўлчов бирлиги)	Бир бирликнинг нархи	Суммаси
	номи	коди			

Давалга берувчи номидан топширди:

М.Ў. _____ (лавозими) _____ (имзо) _____ (имзонинг очиб берилиши)

Қайта ишловчи номидан қабул қилди:

М.Ў. _____ (лавозими) _____ (имзо) _____ (имзонинг очиб берилиши)

Қайта ишлашга берилган хом ашё билан
боғлиқ операцияларни бухгалтерия ҳисобида
акс эттириш тартиби тўғрисидаги низомга
2-ИЛОВА

**Давал хом ашёсини топшириш
НАКЛАДНОЙИ**

_____ -сон

Тузилган санаси «__» _____ 20__ й.

Давалга берувчи _____
(юридик шахнинг тўлиқ номи)

Манзили: _____ СТИР _____

Қайта ишловчи _____
(юридик шахнинг тўлиқ номи)

Манзили: _____ СТИР _____

Т/р	Хом ашё ва материаллар		Ўлчов бирлиги	Миқдори	Нархи	Суммаси
	номи	коди				
Жами:					x	

Давалга берувчи номидан топширди:

М.Ў. _____ (лавозими) _____ (имзо) _____ (имзонинг очиб берилиши)

Қайта ишловчи номидан қабул қилди:

М.Ў. _____ (лавозими) _____ (имзо) _____ (имзонинг очиб берилиши)

Қайта ишлашга берилган хом ашё билан боғлиқ операцияларни бухгалтерия ҳисобида акс эттириш тартиби тўғрисидаги низомга
З-ИЛОВА

**Давал хом ашёсини ҳисобга олиш
ВЕДОМОСТИ**

Хўжалик операциясининг мазмуни	Хом ашё ва материаллар турлари							
	металл прокат		ёғоч		чарм		ва ҳ. к.	
	миқдори	суммаси	миқдори	суммаси	миқдори	суммаси	миқдори	суммаси
Қолдиқ 20 й. ҳолатига								
1.								
2.								
...								
Жами:								
Қолдиқ 20 й. ҳолатига								

М.Ў.

_____ (лавозими)

_____ (имзо)

_____ (имзонинг очиб берилиши)

_____ (лавозими)

_____ (имзо)

_____ (имзонинг очиб берилиши)

Қайта ишлашга берилган хом ашё билан
боғлиқ операцияларни бухгалтерия ҳисобида
акс эттириш тартиби тўғрисидаги низомга
4-ИЛОВА

**Давал хом ашёсини қайта ишлашдан олинган
маҳсулотни қабул қилиш-топшириш
ДАЛОЛАТНОМАСИ**

_____ -сон

Тузилган санаси «__» _____ 20__ й.

Қайта ишловчи _____
(юридик шахнинг тўлиқ номи)

Манзили: _____ СТИР _____

Давалга берувчи _____
(юридик шахнинг тўлиқ номи)

Манзили: _____ СТИР _____

Т/р	Давал хом ашёсини қайта ишлашдан олинган маҳсулот		Миқдори (_____ да) (ўлчов бирлиги)	Бир бирликнинг нархи	Суммаси
	номи	коди			

Қайта ишловчи номидан топширди:

М.Ў. _____ (лавозими) _____ (имзо) _____ (имзонинг очиб берилиши)

Давалга берувчи номидан қабул қилди:

М.Ў. _____ (лавозими) _____ (имзо) _____ (имзонинг очиб берилиши)

Қайта ишлашга берилган хом ашё билан боғлиқ операцияларни бухгалтерия ҳисобида акс эттириш тартиби тўғрисидаги низомга 5-ИЛОВА

Давал хом ашёсининг ишлатилиши тўғрисида ҲИСОБОТ

Тузилган санаси « ____ » _____ 20__ й.

Қайта ишловчи _____
(юридик шахснинг тўлиқ номи)

Манзили: _____ СТИР _____

Давалга берувчи _____
(юридик шахснинг тўлиқ номи)

Манзили: _____ СТИР _____

Т/р	Хом ашё ва материалларнинг номи	Олинган давал хом ашёсининг миқдори (____ да) (ўлчов бирлиги)	Давал хом ашёсини қайта ишлашдан олинган маҳсулотнинг номи	Давал хом ашёсини қайта ишлашдан олинган маҳсулотнинг миқдори (____ да) (ўлчов бирлиги)	Ишлатилмаган давал хом ашёсининг миқдори (____ да) (ўлчов бирлиги)	Чиқиндиларнинг номи	Чиқиндилар миқдори (____ да) (ўлчов бирлиги)	
							жами	шу жумладан, қайтариладиган

_____ (ҳисоботни имзолаган шахснинг лавозими)

_____ (имзо)

_____ (имзонинг очиб берилиши)

М.Ў.